



UNIVERSITÄTS-
BIBLIOTHEK
PADERBORN

Paraphrasis Psalmorum Davidis Poetica

Buchanan, George

Argentorati, M. D. LXVIII.

VD16 B 3125

Psal. XLVII. Omnes gentes plaudite manibus, &c. Carm. gen. 10.

[urn:nbn:de:hbz:466:1-69145](https://nbn-resolving.org/urn:nbn:de:hbz:466:1-69145)

Solis ad hesperium cubile.
 Funesta belli incendia sustulit:
 Fregit cruentæ spicula lanceæ:
 Contriuit arcus, & uolucres
 In cinerem minuit quadrigas.
 Sedate motus mentis, ait Deus,
 Measq; uires noscite, quem colet,
 Quocunq; sub cælo repostas
 Gens hominum colit orbis oras.
 Hac is duelli pacis & arbiter
 Stat, præliorum qui regit exitus,
 Munimen, & nostræ salutis
 Præsidium, Deus Abrahami.

PSAL. XLVII. Omnes gentes plaudite
 manibus, &c. Carm. gen. 10.

Telluris omnes incolæ
 Deo canoros edite
 Plausus, canoris pangite
 Lati Deum præconijs.
 Deum uerendum & arduum,
 Malisq; formidabilem,
 Qui regna fastu turgida
 Frænat potenti dextera:
 Qui bellicosa compulit
 Parère nobis oppida:
 Nostrumq; gentes inclitas
 Armis coegit sub iugum.
 Hereditatem qui suam

Nobis colendam credidit:
Vnde Isaci nepotibus
Aeterna fulget gloria.

En templa scandit præuio
Lætum canente classico:
En scandit auctor omnium
Vulgi secundis plausibus.

Cantate læta carmina
Deo, canora carmina
Cantate: regi psallite
Iucunda uestro carmina:

Qui scepra rerum temperat,
Ac regna terræ diuidit:
Docti modorum dulcibus
Hunc ferte in astra cantibus.

Qui dirigit mortalium
Res, & salubri uinculo
Legum coercet, lucido
E siderum prætorio.

Ad hunc potentes gentium
Se contulere principes:
Vltroq; colla sub iugum
Rerum dedere præfides.

Nostrum Deum dijs ceteris
Sublimiorem agnoscite,
Cælum, solumq; & sidera
Suo regentem numine.

PSAL. XLVIII. Magnus Dominus &
laudabilis, &c.

Carm. gen. 3.
Rector